

ԱՄԵՆԱՊԱՏԻՎ ՊԱՏՐԻԱՐԲ Տ. ԳԱՐԵԳԻՆ ԱՐՔԵՊԻՍԿՈՊՈՍ ԳԱԶԱՆՃՅԱՆ

Սույն թվականի մարտի 10-ին իր Հոգին Տիրոջ ձեռքերի մեջ ավանդեց Հայաստանյայց Առաքելական Եկեղեցու նվիրապետական Աթոռներից մեկի՝ Կոստանդնուպոլսի Հայոց Պատրիարքության ԵրանանորՀ Հայրը՝ Ամենապատիվ Պատրիարք Տ. Գարեգին Արքեպիսկոպոս Գազանճյանը՝ սուգի մատնելով Հայաստանյայց Եկեղեցուն։ Շուրջ ութ տարի իմաստությամբ առաջնորդելով իրեն վստահված թուրքահայ համայնքին, Կոստանդնուպոլսի 83-րդ Սրբազան Պատրիարքը մեկնեց աշխարհից՝ միանալու վերնական լուսաճեմ օթևանի մեջ բնակվող հայկյան անմահ կաճառին։

Ծնված և մեծացած լինելով ամուր կրոնական և եկեղեցական ավանդույթյուններով հարուստ պոլսահայ միջավայրում և թրծվելով ու կազմակերպվելով Երուսաղեմի Սրբոց Հակոբյանց վանական կյանքում, իր քահանայական հիսունամյա ծառայության ընթացքում մշտապես եղավ Հայց. Եկեղեցու նվիրյալ ու ավանդապաշտ մշակը՝ իր ներգործուն մասնակցությունը բերելով Հայց. Եկեղեցու ծառայության դաշտի գրեթե բոլոր բնագավառներում՝ լինի Հովվական, վարչական, թե կրթական։

Եկեղեցասիրության առաջին սերմերը նրա Հոգում ցանվեցին դեռևս մանկության շրջանում, ընտանեկան միջավայրում. աղոթք էր հնչում մշտապես նրանց հարկից ներս։ Վեցամյա Պետրոսը մոր կարած շապիկը հագին մասնակցում էր եկեղեցական արարողություններին, և մանկական Հոգին լցվում էր Աստվածային ճշմարտություններով ու եկեղեցական ավանդություններով։

Ծնվել է 1927 թ., Կոստանդնուպոլսում։ Նախնական կրթությունը ստացել է Թուրքարուհի Լեոն-Վարդուհյան և Պեղճյան Մայր վարժարաններում։ Այնուհետև ուսումը շարունակել է Երուսաղեմի Ժառանգավորաց վարժարանում՝ Երուսաղեմի Հայոց միաբանության անդամ Մուշեղ վրդ. Հայրապետյանի՝ իր մոր հորեղբոր առաջարկությամբ։ Եվ թեև մայրը կողմնակից չէր այդ տեղափոխությանը, սակայն ուսումնատեղն ավատանին մի օր Պոլսից ճանապարհ Հնկավ դեպ Երուսաղեմ՝ չմտածելով անգամ, որ այդ ճանապարհի վերջում իր համար մի նոր՝ աներևակայելի կյանքի սկիզբ պիտի դրվեր։

1945 թ., հաջողությամբ հանձնելով քննությունները, դառնում է Աստվածաբանության և փիլիսոփայության մասնագետ և նույն թվականին, ձեռամբ Կյուրեղ Պատրիարքի, սարկվազ է ձեռնադրվում և կոչվում ուսուցչական նվիրական դործի՝ Ժառանգավորացում և Ս. Թարգմանչաց դպրոցում։ Հինգ տարի անց, 1950 թ., ձեռնադրվում է կուսակրոն քահանա և Երուսաղեմում վարում դիվանապետի պաշտոնը, ընտրվում է Ընդհանուր Ժողովի Բ Ատենադպիր և Տնօրեն Ժողովի անդամ։

Այս ժամանակ է, որ նրա կարիքը զգում են իր իսկ ծննդավայրում՝ Պոլսում. Գարեգին Արքեպիսկոպոս Խաչատուրյան Պատրիարքը նրան հրավիրում է վարելու ծրագրված և բացվելիք Ս. Խաչ Դպրեվանքի տեսչի պատասխանատու պաշտոնը։ Նա առանց վարանելու վերադառնում է Պոլիս և մինչև Դպրեվանքի բացումը ուսուցչադործում Կեղրոնական և Պեղճեան վարժարաններում՝ միաժամանակ տնօրինելով Պատրիարքարանի քահանայից լսարանները։



Կ. ՊՈԼՍՈՒ ՀԱՅՈՑ ԵՐԶԱՆԿԱՅԻՇԱՏԱԿ
ԱՍԵՆԱՊԱՏԻԿ ՏԵՐ ԳԱՐԵԳԻՆ Բ ՊԱՏՐԻԱՐԺԸ
(1927-1998)

1954-59-թթ. վարում է նորարաց Դպրեվանքի տեսչի պաշտոնը: Արդեն Գարեգին ծ. վարդապետը Դպրեվանքում դասավանդում էր Հին և Նոր մատենագրություն:

Իր բազմաթիվ կրոնական և գրական հոդվածներով ու գիտական աշխատություններով թղթակցել ու հրատարակվել է ժամանակի Հայտնի պարբերականներում ու թերթերում՝ «Սիօն», «Միածան», «Հայց. Եկեղեցի», «Նոր Աշխարհ», ինչպես նաև այլ հրատարակություններում: 1952 թվականից խմբագրում է Պատրիարքարանի «Շողակաթ» պաշտոնաթերթը:

Վարդապետական աստիճան ստացել է 1950 թ.՝ «Զորս փոքր մարգարէները» վերտառությամբ թեզի հիման վրա: Իսկ Դպրեվանքի բացման օրը (1954 թ. հունվարի 22) Գարեգին Պատրիարք ինչպատուրյանը նրան տալիս է Մայրազույն Վարդապետի աստիճան: Թեզն էր՝ «Ս. Ներսես Շնորհալիի ընդհանուր թուղթերը»:

Իր եռանդն ու գործունյա բնավորությունը փայլեցին նաև հովվական ասպարեզում: Նախ 1959 թվականին ստանձնեց Վաշինգտոնի (ԱՄՆ) հովվությունը, ուր ծավալեց եկեղեցական, կրթական, վարչական բեղուն գործունեություն, ապա, 1966 թվականին, ծառայության է կոչվում Ավստրալիայի և Հեռավոր Արևելքի շրջան՝ Հայրապետական Պատվիրակի Հանգամանքով, և երջանկահիշատակ Տ. Տ. Վազգեն Ա Հայրապետի ձեռամբ ձեռնադրվում է եպիսկոպոս: Շուրջ տասնհինգ տարի ժրջան աշխատանքով կարողացավ հաղթահարել նոր կազմվող գաղութի առջև ծառացած դժվարություններն ու խոչընդոտները: Նրան հաջողվեց 1968 թ. շրջանը վերածել Առաջնորդության:

Կարևոր ներդրում է ունեցել նաև եկեղեցաշինության ասպարեզում՝ 1962 թ. Վաշինգտոնում, 1972 թ. Սիդնեյում և 1976 թ. Միլբուռնում կառույցել է նոր եկեղեցիներ:

1981 թ. իր միաբանակից եղբայրների կողմից ընտրվում է Երուսաղեմի Հայոց Պատրիարքության լուսարարապետ: Երկրից երկիր, մի պաշտոնից մյուսին տեղափոխվելն անգամ երբեք նրա մեջ չպակասեցրեց վանական կյանքով ապրելու ձգտումը:

Սակայն Աստվածային նախախնամությունը առավել պատասխանատու ծառայություն էր նախատեսել կազմակերպչական ունակություններ ու դժվարությունները հաղթահարելու աննկուն կամք դրսևորած եռանդուն հոգևորականի համար:

Ազգը գնահատեց նրան իբրև հավատարիմ մշակ և 1990 թ. ընտրեց Հայր Թուրքահայության՝ որպես՝ Պատրիարք Հայոց Կոստանդնուպոլսի:

«Կ. Պոլսոյ. պատմական Աթոռին վրայ երջանկայիշատակ Պատրիարքի ցուպը եղաւ ու մնաց ծաղկեալ, քանզի իր դահակալութեան ութ տարիները եղան արդիւնաւետ եւ պողալից: Թուրքիոյ տարածքին վրա մեր ունեցած եկեղեցիներն ու համայնքային հաստատութիւնները մնացին չէն ու պայծառ»: Այս բառերով է բնորոշում Վեհափառ Հայրապետը Սրբազան Պատրիարքի վերջին տարիների գործունեությունը իր ցավակցական զրի մեջ:

Եվ իրավամբ, արժանիորեն բազմելով Հայց. Եկեղեցու նվիրապետական Աթոռներից մեկին, նա ձեռնամուխ էղավ Աթոռի բարգավաճման ու դիրքի ամրապնդման, նոր հոգևորականների պատրաստման, նվիրապետական Աթոռների, ինչպես նաև քույր եկեղեցիների հետ սերտ հարաբերությունների մշակման քաղաքական դործին: Նրան հաջողվեց պետական մակարդակով լուծում գտնել Թուրքահայ Համայնքին հուզող բազմաթիվ խնդիրներին:

Անհրաժեշտությունից մղված, բազմաթիվ անգամներ իր բողոքի ձայնը հասցրեց թե՛ պետական ատյաններին և թե՛ միջազգային կազմակերպություններին՝ թուրքական կամայականություններից զերծ պահելու և՛ Պատրիարքությունը, և՛ համայնքը, և՛ համայնքապետական կալվածքները, եկեղեցիները, վանքերն ու պատմական հուշարձանները: Իր Պատրիարքությունը չըջանում ձեռնարկել է պատմական բազմաթիվ եկեղեցիների բարեգարդումն ու նորոգությունները: Նա իր ուշադրության կենտրոնում պահեց կրթական և ուսուցման մակարդակի բարելավման գործը: Միջոցներ հայթայթեց վարժարաններին մշտական եկամուտներով ապահովելու նպատակով:

«Մեր սիրեցեալ եղբոր գործերը երկար ատեն պիտի յիշուին: Պիտի չմոռնանք զինքը, իր զուարթախօս, զուարճալի, հաղորդական, ընկերասէր նկարագիրը»: Այս բնորոշումներով էր ճանապարհում ի Քրիստոս իր սիրեցյալ եղբորը եգիպտոսի Հայոց Առաջնորդ Գեր. Տ. Զավեն արքեպիսկոպոս Զինչիյանը՝ դամբանական կարդալով Սրբազան Պատրիարքի անկենդան մարմնի առջև:

Սրբազան Պատրիարքի բարձր հեղինակության և տարբեր շրջանակներում վայելած հեղինակության վկայություններ էին բազմաթիվ ցավակցական դրերն ու հեռագրերը իր վախճանման առիթով՝ Հայց. եկեղեցուն և վիրապետական Աթոռներից, քույր եկեղեցիների պետերից և տարբեր պետությունների ղեկավարներից:

Ազում է պոլսահայությունը, սգում է Հայ ժողովուրդը, որովհետև ոչ ևս է իր անձնդիր Պատրիարքներից մեկը, որովհետև ասդենական կյանքում նրա մշտազգվարթ, անբիծ ու խորաթափանց նկարագիրը վայելելու հաճույքը չի ունենալու այլևս:

«Էջմիածին» ամսագրի խմբագրությունը իր սգակցությունն է հայտնում Կ. Պոլսի Հայոց Պատրիարքությանը և աղոթում Բարձրալին, որ իր լուսավոր օթարաններում ընդունի Սրբազան Պատրիարքի հոգին:

Աղոթում ենք, որ Տերը Աստվածաբարյալ Գարեգին Պատրիարքի նման բազմապիսի շնորհներով օծտված Պատրիարք բազմեցնի Հայց. եկեղեցուն և վիրապետական Աթոռին, և սգաքողը վերացվի պատրիարքական գահից:

ԱՐՇԵՆ ԱՐԵՂԱ ՍԱՆՈՍՅԱՆ